

سطور الذكريات

خطيت على جبين الورق
حبة حنين
وما بين سطور الذكريات
بالغصب نزلت دمعتين
وسالت كل العرافين

ليه اللقا بعد الغياب
بيكون عذاب؟
وليه الزمن دائما بخيل؟
ولحد امتي الانتظار
على شوك ونار؟

والرد كان
وصفة تزود ع الوجع حبة مرار
يا اللي انتوا واصفين الدوا
الصبر مر ف اوله وف اخره مر

وقطر الحياه
واقف على شريط الوجع
مش راضى بينا يمر

وانا كل حلمى كان يادوب
لو اعيش يومين
فاتت سنين
واشارة حمرا تقول خلاص
ضاعت سنين العمر
ف لويت دراع الزمن
وقولت اتحداه
قام جابنى بالقاضية
كشر لى ب انياه
وزعق ف وشى وقال
ماكنتى يوم راضية
مين قال سكوتى رضا
دة كان مدارى الغلب
والقلب لما حب
وقرر انه يعيش
الدنيا مش راضية